

Uvodna riječ

ŠTA ZNAM O BILJKAMA I ŽIVOTINJAMA, sedma knjiga velike ilustrovane enciklopedijske serije za mlade DJEČJE SVEZNANJE, postaće dobar drug i prijatelj svim mladim ljubiteljima prirode koji žele da obogate svoja znanja o biljkama i životinjama što nastanjuju našu Planetu.

Od trojanskog konja do šećerne trske, od akantovog lista — koji je nadahnuo mnoge umjetnike i građevinare — do orijaškog gorile King-Konga, od zamorčića do Hanibalovih slonova — životinje i biljke na svoj način igraju veoma važnu ulogu u nauci, historiji, umjetnosti . . .

Pored osnovnih, kratkih naučnih definicija, ova knjiga daje mnoga šira objašnjenja, upoređenja i tumačenja 421 pojma iz biljnog i životinjskog svijeta. Ko je Buridanov magarac? Kako se iz šećerne repe dobija šećer? Šta je čovječija ribica? Zašto djetlić najavljuje kišu? Šta znači »šaranov skok«? Šta je to pustinjska lisica? Kada su se pojavile prve banane na stolovima Evropljana? . . .

Na sva ova i mnoga druga pitanja naći ćete odgovore u ovoj knjizi. Za svaku navedenu biljku i životinju dati su osnovni podaci o tome kojoj vrsti pripada, gdje živi, čime se hrani, a vašu radoznalost zadovoljiće i mnoge anegdote i kratke priče o vama dosad nepoznatim tajnama prirode, kao i o narodnim vjerovanjima o pojedinim biljkama i životinjama. Pa i ako zaboravite, na primjer, iz koje zemlje vodi porijeklo kafa, sigurno ćete zapamtiti da je svijet otkrio stimulaturna svojstva kafe zahvaljujući nestašnim kozama!

Knjiga je obogaćena novim tekstovima o raznovrsnosti i osobenostima biljnog i životinjskog svijeta u našoj zemlji. Vjerujemo da smo time od ove ilustrovane enciklopedije napravili koristan i zanimljiv priručnik za djecu osnovnoškolskog uzrasta, a posebno za mlade ljubitelje prirode.